

Morning Dogri News

25th August 2024

09-20 Hrs

Headlines

1. विधानसभा चुनावें शा पैहले जम्मू-कश्मीर च सियासी म्हौल पूरी चाल्ली गर्माए दा ऐ। पैहले गेड़ दे चुनावें लेई नामांकन भरने दी खीरी तरीक 27 अगस्त ऐ।
2. प्रधानमंत्री नरेन्द्र मोदी, जे.पी. नड्डा, राजनाथ सिंह ते अमित शाह होर अज्ज बीजेपी दी केन्द्री चुनावें कमटी दी बैठक च हिस्सा लैउन। अज्ज संझां तगर पैहले गेड़ दे चुनावें लेई बीजेपी दे मेदवारें दे नाएं पर फैसला होई सकदा ऐ। तोआई कांग्रेस ते नेशनल कांफ्रेंस दे नेता सीटें दी बंडुड आहली बवस्था थमां खुश नेई हैन।
3. प्रधानमंत्री नरेन्द्र मोदी होर अज्ज दिनै 11 बजे आकाशवाणी पर अपने मन की बात कार्यक्रम राहें लोकें कन्नै विचार सांझे करउन।
4. जम्मू च ईवीएम ते वीवीपैट मशीनें गी बिच्चा-बिच्चा तालियै सरबंधत केन्द्रें च भेजने दी पैहली प्रक्रिया तोड़ चाढी गई ऐ।



Politics J&K

चुनां आयोग आस्सेआ जम्मू कश्मीर च विधानसभा चुनावें दी घोषणा परैत तकरीबन 6एं बरें दे वक्फे मगरा इत्थें सियासी गतिविधियां तेज होई गेइयां न। पिछली बारी राजनीतिक हलचल लोकसभा चुनावें दरान होई ही ते हुन विधानसभा चुनावें सियासी उथल-पुथल मचा करदे न। जम्मू कश्मीर च चुनावें म्हेशां गै खास रेह न जेह्दे बक्ख-बक्ख गैर ममूली कारणें कन्नै प्रभावत हुंदे न, जिंदे च चुनौतीपूर्ण सुरक्षा स्थिति बी शामिल ऐ। उआं हाल च गै होए दे लोकसभा चुनावें च रिकार्ड तोड़ मतदान नै औंदे विधानसभा चुनावें च बी इस्सै चाल्ली लोकें दी बद्ध शा बद्ध हिस्सेदारी दी आस जगाई ऐ। दक्खन कश्मीर दिएं 16एं सीटें ते जम्मू संभाग दे त्रै जिलें डोडा, किश्तवाड़ ते रामबन दिएं 8 सीटें पर पैहले गेड़ दा मतदान अगले म्हीने दी 18 तरीक गी होना ऐ। नामांकन पर्चे गी दाखल करोआने दी खीरी तरीक उआं ते 27 अगस्त ऐ पर अजे तगर कुसै बी मुख्ख राजनीतिक पार्टी नै अपने मेदवारें दे नाएं दा ऐलान नेई कीता ऐ।



BJP Meet

भारती जनता पार्टी दी केन्द्री चुनावें कमटी दी अज्ज नमीं दिल्ली च बैठक लग्गा करदी ऐ जिस दरान जम्मू-कश्मीर ते हरियाणा दे असैम्बली चुनावें लेई मेदवारें दे नांS गी मुक्कदा रूप दित्ता जाहग। पार्टी दे सुत्तरें मुजब पार्टी दे राष्ट्री अध्यक्ष जे.पी. नड्डा हुंदी अगुवाई आहली इस केन्द्री चुनावें कमटी च प्रधानमंत्री नरेन्द्र मोदी, रक्षा मंत्री राजनाथ सिंह ते गृह मंत्री अमित शाह बी शामिल होउन ते इस दरान ओह जम्मू-कश्मीर दे असैम्बली चुनावें लेई मेदवारें दे नांS पर मन्थन करउन। सुत्तरें मुजब, 18 सितम्बर गी होन जा'रदे पैहले गेड़ दे चुनावें लेई अज्ज रातीं तगर मेदवारें दे नाएं दा ऐलान करी दित्ता जाहग।



PDP

पीपुल्स डेमोक्रेटिक पार्टी दि एं प्रधान महबूबा मुफ्ती होरें आखेआ ऐ जे उंदी पार्टी कांग्रेस ते नेशनल कांफ्रेंस दे गठबंधन गी अपना पूरा समर्थन देग ते जेगर ओह उंदी पार्टी दा एजेंडा स्वीकार करने लेई तैयार न तां ओह जम्मू-कश्मीर असैम्बली चुनाएं च सब्बै सीटां गठबंधन लेई छोड़ी देडन। असैम्बली चुनाएं लेई पीडीपी दा चुनावी घोषणा पत्तर जारी करने परैन्त पत्रकारें कन्नै गल्ल करदे होई मुफ्ती होरें एह गल्ल आखी। घोषणा पत्तर च पीडीपी नै भारत ते पाकिस्तान बशकार कूटनीतिक पैहलकदमिं दी हिमायत करने दा वायदा कीता ऐ। एहदे अलावा उनें विश्वास ब्हाली आहले उपाएं गी लागू करने, बन्ने दे रोआर-पार बपार गी पूरी चाल्ली ब्हाल करने, जन सुरक्षा कानून पीएसए, यूएपीए ते आपसपा गी हटाने दा वायदा बी कीता ऐ। पीडीपी नै हर इक परोआर गी 200 युनिट मुफ्त बिजली देने ते पानी लेई मीटरें दी बवस्था खत्म करने दी गल्ल बी आखी ऐ। एहदे अलावा उनें गरीबी रेखा थमां हेठ जीन जीआ करदे परोआरें गी हर ब'रे गैस दे 12 सलैंडर मुफ्त देने, बुजुर्गें, विधवाएं ते दिव्यांगें गी थहोने आहली माली मदाद गी दूना करने दा बी वादा कीता ऐ। पार्टी नै हर ब'रे 60 ज्हार ध्याड़ीदारें गी पक्का करने ते परानी पैशन स्कीम परतियै शुरु करने दी गल्ल बी आखी ऐ।



NC Congress

जम्मू-कश्मीर च असैम्बली दे चुनाएं लेई कांग्रेस ते नेशनल कांफ्रेंस दे गठबंधन गी लेइयै यक्कोतक्की आहले हालात बने दे न। प्रदेश कांग्रेस दे नेताएं कल पार्टी दी चुनां स्क्रीनिंग कमेटी गी सब्बनें 90 असैम्बली हलकें लेई मेदवारें दी सूची सौंपी ऐ। कांग्रेस पार्टी दी चुनां स्क्रीनिंग कमेटी दी प्रदेश कांग्रेस दे मुकामी नेताएं कन्नै बैठक बी लग्गी ऐ। बैठक दी प्रधानता कांग्रेस पार्टी दे जम्मू-कश्मीर लेई चुनां प्रभारी सुखजिंदर सिंह रन्धावा होरें कीती ते प्रदेश कांग्रेस कमेटी दे प्रधान तारिक हमीद कर्रा होरें बी एहदे च हिस्सा लैता। पार्टी दे इक नेता नै दस्सेआ ऐ जे किश नेताएं सीटें दी बंड्ड गी लेइयै अपनी चैंता जाहर कीती ते कन्नै गठबंधन दे प्रति नेशनल कांफ्रेंस दी ईमानदारी पर बी सोआल पुट्टे। इस मौके एह फैसला बी लैता गेआ हा जे डेमोक्रेटिक प्रोग्रेसिव आजाद पार्टी थमां कुसै बी नेता गी कांग्रेस च नेई औन दित्ता जाहग। तोआई नेशनल कांफ्रेंस दे प्रधान डाक्टर फारुक अब्दुल्ला होरें पार्टी दे सीनियर नेताएं दी इक बैठक लाइयै केई सारे मामलें पर चर्चा कीती। इंदे च कांग्रेस पार्टी कन्नै सीटें दी बंड्ड आहला मसला बी शामिल हा। पार्टी दे केई नेता सीटें दी बंड्ड आहली बवस्था गी लेइयै खुश नेई हैन कीजे उंदा मन्नना ऐ जे एहदे कन्नै किश हलकें च पार्टी दे हितें गी नुकसान पुज्जी सकदा ऐ।



Janamshtami

संगारै 26 अगस्त गी मनाए जाने आली श्री कृष्ण जन्माष्टमी शा पैहले जंदे रोज जम्मू शैहरा च इक शानदार शोभा यात्रा च बच्चे, नोजवान ते बुर्जग भगवान कृष्ण दे भजन गांदे होई शामिल होए। शैहरा दे मशहूर श्री रघुनाथ जी मंदर थमां एह शोभा यात्रा शुरु होई जेहड़ी वीर मार्ग, शहीदी चौक, राजेन्द्र बजार, कनक मंडी, सिटी चौक, ओल्ड आस्टिल रोड, पुरानी मंडी, लिंक रोड, जैन बजार, चौक चबूतरा, पक्का डंगा, मोती बजार, गीता भवन, रणवीरेश्वर मंदर, शालामार रोड, सिटी चौक थमां होंदे होई रघुनाथ मंदर पुज्जियै मुकम्मल होई। शोभा यात्रा दा सरिस्ता जेएंडके धमार्थ ट्रस्ट आस्सेआ कीता गेदा हा जेहदा नेके बजारें दे संगठनें ते मुस्लिम बिरादरी दे मिंबरें यात्रा दरान सुआगत कीता। शोभा यात्रा गी अमन, रमानदारी ते सुचारू ढंगै सिर करोआने आस्तै सुददे बंदोबस्त कीते गेदे हे। इस मौके पुलस दे आला अफसर बी मजूद हे।



PM-MKB

प्रधानमंत्री नरेन्द्र मोदी होर अज्ज बडलै 11 बजे आकाशवाणी पर प्रसारत होने आले "मन की बात" कार्यक्रम राएं लोकें कन्नै अपने बचार सांझा करगंन। एह इस रेडिया कार्यक्रम दी 113मीं कड़ी होग। प्रधानमंत्री नरेन्द्र मोदी हुंदे आस्सेआ लगातार त्रीह बारी प्रधानमंत्री दा औहदा संभालने मगरा एह त्रिया मन की बात कार्यक्रम होग। एह कार्यक्रम आकाशवाणी ते दूरदर्शन दे सारे नेटवर्क, आकाशवाणी समाचार दी वैबसाइट ते न्यूज ऑन एयर ऐप पर बी कन्नो कन्नी प्रसारत कीता जाग। इस कार्यक्रम दा लाइव प्रसारण आकाशवाणी समाचार, डीडी न्यूज़, प्रधानमंत्री हुंदे दफ्तर ते सूचना ते प्रसारण मंत्रालय दे यू ट्यूब चैनलें पर बी कीता जाग। आकाशवाणी पर हिंदी प्रसारण दे तुरत मगरा एहदा क्षेत्रीय भाषाएं च बी प्रसारण कीता जाग।



Randomizations EVM

जम्मू कश्मीर च औंदे विधानसभा चुनाएं लेई ईवीएम ते मतदान सत्यापन पर्वी वीवीपीएटी दी जांच दा पैहला गेड कल जम्मू जिले च कामयाबी कन्ने मुकम्मल होआ। आकाशवाणी दे जम्मू संवाददाता नै खबर दित्ती ऐ जे एह इस सारी प्रक्रिया रिटर्निंग अफसरें ते सियासी दनें दे नुमायंदे दी मजूदगी च कीती गई। इस प्रक्रिया कन्नै तैआर लिस्टां राजनीतिक दलें दे नुमायंदे गी सौपिया गेइयां ते इस पूरे कम्म दी वीडियो बी बनाई गई। जांच आली कारवाई भारतीय चुनां आयोग आस्सेआ जारी कीते गेदे दिशा-निर्देशें मताबक कीती गई। जिले दे 11 विधानसभा हल्कें दे 1497 मतदान केन्द्र लेई कुल 2242 बैलेट यूनिट, 2242 कंट्रोल यूनिट ते इन्नियां गै वीवीपीएटी मशीनें दी रेंडमाइजेशन कीती गई।



SVEEP Activities

औंदे विधानसभा चुनाएं च लोकें दी बद्ध शा बद्ध शमूलियत गी जकीनी बनाने दे मकसद कन्नै रामबन जिला प्रशासन नै समूलचे जिले च व्यवस्थित मतदाता शिक्षा ते चुनावी हिस्सेदारी सरबंधी स्वीप कार्यक्रमें दी इक लड़ी दा सरिस्ता कीता। आकावाणी जम्मू संवाददाता नै दस्सेआ जे इनें पैहलें दा लक्ष्य वोटरें गी जागरूक बनाना हा, जिंदे च नोजवान मतदाताएं पर टकोहदा ध्यान दित्ता गेआ। मुख्य कार्यक्रमें च इक सरकारी हायर सकैंडरी स्कूल ते प्राइमरी अप्पर स्कूल हरवारी च लगगा, जित्थें बड़ी बद्ध गिनतरी च विद्यार्थिएं ते आम लोकें एहदे च शिरकत कीती। कार्यक्रम च विधानसभा चुनाएं च मतदान दे महत्वै पर जोर पाया गेआ, टकोहदा करियै पैहली बारी वोट पाने आलें गी अपने वोट पाने आले हक दा इस्तेमाल करने लेई प्रेरित कीता गेआ। गौरमेंट हाई स्कूल पेरहिंदर च बी इक बड्डे कामयाब स्वीप कार्यक्रम दा सरिस्ता कीता गेदा हा।



Blood Donation

डोडा जिले दे उप जिला अस्पताल गंदोह च कल आयोजित कीते गेदे स्वीप कार्यक्रम दरान रक्तदान शिविर दा सरिस्ता कीता गेआ। आकाशवाणी दे जम्मू संवाददाता नै जानकारी दित्ती जे खून देने आले 22एं जनें मानवता दी सेवा दे मकसद कन्नै रक्तदान कीता। उंदे इस अनमुल्ले योगदान दी सराहना करदे होई गंदोह दे बीएमओ डाक्टर फारूक सलीम होरें कुसै बचाने च मददगार साबत होने आलठे इस कम्में च समर्पण ते मनुक्खी भावना गी स्वीकार कीता। बीएमओ होरें इस गल्ला पर बी जोर पाया जे हर जने टकोहदा करियै नोजवानें गी अगगे आइयै रक्तदान करना लोडचदा।



SVEEP Udhampur

लोकें च मतदाता जागरूकता बधाने आस्तै उधमपुर दियां जिला चुनां अधिकारी सलोनी राय होरें कल डीसी दफतर थमां स्वीप अभियान तैहत् इक बड्डी रैली गी झंडी दस्सियै रवाना कीता। आकाशवाणी दे जम्मू संवाददाता ने खबर दित्ती ऐ जे जिला प्रशासन दे आला अफसरें दे कन्नो कन्नी बक्ख-बक्ख मैह्कमे दे नुमायंदे, विद्यार्थिएं ते शैक्षणिक इदारें दे कर्मचारिएं इस रैली च शामिल होए। रैली स्लाथिया चौक, कोर्ट रोड, रामनगर चौक, गोल मार्किट ते बस स्टैंड थमां होइयै मिनी स्टेडियम पुज्जियै मुकम्मल होई। इस मौके जिला चुनां अधिकारी होरें लोकतंत्र गी मजबूत करने आस्तै हरेक वोट दी कीमत पर बल पाया ते सब्बै वोटरें गी औंदे विधानसभा चुनाएं च 100 फीसदी मतदान लेई कोश्ट करने लेई प्रेरित कीता। मगरा जिला प्रशासन नै स्पोर्टस स्टेडियम उधमपुर च स्वीप पैहल तैहत् गुड्डिएं डोआने आले इक कार्यक्रम दा बी सरिस्ता कीता।

